

Rasim Lakota  
Zastupnik SBB BIH

BOSNA I HERCEGOVINA  
FEDERACIJA BOSNE I HERCEGOVINE  
KANTON SARAJEVO  
SKUPŠTINA KANTONA SARAJEVO  
n/r Ministarstva za obrazovanje, nauku i mlade Kantona Sarajevo

Sarajevo, 04.04.2018.godina

### **ZASTUPNIČKO PITANJE**

Tražim odgovor od Ministarstva za obrazovanje, nauku i mlade Kantona Sarajevo u vezi sa poduzetim aktivnostima i dinamikom implementacije Zakona o visokom obrazovanju, posebno u dijelu kojim se propisuje obaveza:

a) usklađivanja pravnog statuta Univerziteta u Sarajevu i njegovih članica sa Okvirnim Zakonom o visokom obrazovanju u BiH i Zakonom o visokom obrazovanju Kantona Sarajevo, kao i u odnosu na

b) uvođenje Univerziteta u Sarajevu u sistem trezorskog poslovanja shodno obavezi utvrđenoj Zakonom o budžetima u Federaciji BiH i Zakonom o trezoru u FBiH.

U smislu naprijed navedenog, tražim da mi se dostavi informacija da li su i koje aktivnosti provedene od strane Vlade Kantona Sarajevo, Ministarstva za obrazovanje, nauku i mlade KS i posebno Ministarstva finansija Kantona Sarajevo, shodno obavezi propisanoj Zakonom o visokom obrazovanju kojeg je ova Skupština usvojila u mjesecu julu 2017. godine. Također, tražim da mi se dostavi precizna informacija koje obaveze su u procesu pravne integracije i uvođenja u sistem trezorskog poslovanja Zakonom o visokom obrazovanju propisane za UNSA, koje obaveze je UNSA uspješno izvršio, te koje obaveze nisu realizovane, uz navođenje razloga za neizvršavanje istih. Nadalje, tražim da mi se dostavi odgovor kada će resorno Ministarstvo za obrazovanje, nauku i mlade KS i Vlada Kantona Sarajevo konačno pokrenuti socijalni dijalog sa predstavnicima Sindikata UNSA koji bi trebao rezultirati potpisivanjem Kolektivnog ugovora za oblast visokog obrazovanja i nauke. Posebno smatram značajnim da mi se dostavi odgovor kada će resorno Ministarstvo obrazovanja, nauke i mladih KS i Vlada KS pristupiti temeljitom preispitivanju osnovice i koeficijentata za obračun plata za uposlenike na UNSA koji datiraju još iz 2007. godine.

### **OBRAZLOŽENJE:**

Usvajanjem Zakona o visokom obrazovanju 31.07.2017. godine uspostavljena je obaveza usklađivanja pravnog statusa UNSA i njegovih članica sa Okvirnim Zakonom o visokom obrazovanju u BiH kao i Zakonom o visokom obrazovanju u Kantonu Sarajevo. Također, Zakonom o visokom obrazovanju KS propisana je obaveza uvođenja UNSA u sistem trezorskog poslovanja, na koji način bi se konačno, nakon dugo vremena, ispoštovali Zakon o trezoru u FBiH i Zakon o budžetima u FBiH koji propisuju da sve javne ustanove svoje

poslovanje moraju obavljati kroz sistem trezorskog poslovanja. Smatram da je implementacija zakonskih obaveza u funkciji zaštite interesa UNSA i njegovog daljnjeg razvoja te podizanja transparentnosti u radu na viši nivo. Podizanje transparentnosti u radu UNSA kroz sistem trezorskog poslovanja, ali i uspostavu unutrašnje organizacije kroz definiranje procesa i odgovornosti tijela UNSA će biti u funkciji eliminacije poljuljanog povjerenja javnosti u sistem visokog obrazovanja.

Posebno, želim naglasiti da implementacija Zakona o visokom obrazovanju treba da doprinese poboljšanju materijalnog statusa zaposlenika na UNSA. Podsjećanja radi, pitanje vrednovanja rada zaposlenih na UNSA, pitanje visine plata kao i potpisivanje Kolektivnog ugovora za oblast visokog obrazovanja je u ovoj Skupštini već više puta problematizirano. Kako je poboljšanje materijalnog statusa zaposlenih na UNSA, a posebno mladih kadrova (asistenata i viših asistenata) nemoguće bez uvođenja UNSA u sistem trezorskog poslovanja i efikasne kontrole finansijskih tokova, tražim da resorno ministarstvo, Vlada KS i UNSA intenziviraju aktivnosti na izvršenju obaveza propisanih Zakonom o visokom obrazovanju. Tražim da resorni ministar, ako je u mogućnosti usmeno odgovori na ovo pitanje, a svakako insistiram i na dostavi odgovora na pisanoj formi.

Zastupnik SBB BIH

prof. dr. Rasim Lakota